

# Nafas baharu Dataran Banting

MDKL giat jalankan kerja naik taraf fasa ketiga dataran itu demi kemudahan pengunjung



Kemudahan sukan wall climbing juga bakal menanti pengunjung.



Kerja-kerja pembinaan pelbagai kemudahan fasa ketiga sedang dijalankan.

**BANTING** - Penyediaan kemudahan yang terbaik untuk masyarakat merupakan matlamat dan agenda utama Majlis Daerah Kuala Langat (MDKL) selaras dengan kepesatan pembangunan daerah ini.

Yang Dipertuanya, Mohd Azhar Mohamed Ali berkata, melalui usaha berterusan MDKL yang mahu-

kan penduduk daerah ini menikmati satu kemudahan yang lebih kondusif, MDKL kini giat menjalankan kerja-kerja menaik taraf Dataran Banting melalui fasa ketiga dengan pelbagai komponen yang melibatkan keluasan 4,020 meter persegi.

Menurutnya, ia dibina setelah dua fasa terdahulu siap sepenuhnya

nya melibatkan pembinaan *skate plaza* dan *bowl*, *elevated platform* dengan tangga, dinding grafiti dan sebagainya.

Mohd Azhar berkata, bagi memberikan kelainan dan kemudahan kepada pengunjung Dataran Banting, melalui projek fasa ketiga ini, MDKL akan membina *wall climbing* (tembok mendaki tiruan), *walkway* (laluan siar kaki), lampu spotlight, *natural boulder* (batu semulajadi), *softscape*, *galvanised iron box-up lettering*, bangku taman, wakaf, tong sampah, papan tanda dan juga logo MDKL

bagi memberi keselesaan kepada pengguna.

"Kerja-kerja naik taraf ini adalah selaras dengan slogan kerajaan negeri, 'Dari Rakyat Untuk Rakyat' dan ia juga sudah semestinya dapat memberikan keseronokan kepada pengunjung yang datang bersama keluarga.

"Pihak MDKL sentiasa berusaha bersungguh-sungguh dengan pelbagai cadangan dan perancangan bagi memajukan lagi daerah ini agar pembayar cukai menikmati satu kehidupan yang lestari," katanya kepada *Sinar*

*Harian*.

"Jika kita lihat dalam dua projek yang terdahulu, Dataran Banting yang telah dijenamakan semula itu dapat mencuri perhatian pengguna jalan raya apabila dataran tersebut sentiasa dikunjungi oleh pengunjung tak kira masa," katanya.

Katanya, justeru beliau berharap penduduk di daerah ini dapat menggunakan segala kemudahan yang ada dengan sebaik mungkin kerana banyak peruntukan atau wang rakyat yang telah dibelanjakan bagi dinikmati semua pihak.

## Pusat tumpuan pengunjung

WALAUPIUN dataran itu dinamakan Dataran Banting, namun ia terletak di Dun Morib sekaligus menambahkan lagi bilangan pusat tumpuan pengunjung dalam dan luar daerah.

Adun Morib, Hasnul Baharuddin berkata, beliau mengalu-alukan pembangunan baharu di kawasan Morib sekaligus mengharapkan kemudahan yang didirikan membantu menaikkan imej kawasan itu.

Menurutnya, tidak dinafikan Kuala Langat masih kekurangan kawasan riadah namun inisiatif MDKL mewujudkan pelbagai kemudahan ternyata menggembirakan pelbagai pihak.

"Saya harap dataran ini dijadikan kawasan pilihan dalam menganjurkan pelbagai program dan aktiviti.



ABDULLAH SANI



HASNUL

"Kita nak tengok semua kawasan riadah atau pembangunan sukan di daerah ini dimanfaatkan oleh semua lapisan masyarakat," katanya.

Sementara itu, Ahli Parlimen Kuala Langat, Abdullah Sani Abdul Hamid berkata, perubahan di dataran itu sudah lama dinantikan masyarakat.

"Tak dinafikan bila sebut Dataran Banting saja peng-

guna pasti fikirkan kawasan riadah yang dilengkapi dengan kemudahan bersukan.

"Jadi apa juga kemudahan yang bakal didirikan di situ diharap bantu peminat sukan terutama pengguna trek jogging di kawasan itu beriadah.

"Saya nampak kemudahan itu dapat memberi semangat baru bagi penduduk untuk terus mengaktifkan gaya hidup sihat," katanya

## Tidak sabar guna kemudahan sukan

**TINJAUAN** *Sinar Harian* mendapati kebanyakan pengunjung tidak sabar menunggu kemudahan sukan siap sepenuhnya.

Umar Abdul Aziz Samsudin, 16, berkata, dia sering singgah ke Dataran Banting bermain papan luncur dan kasut roda kerana kawasan itu adalah satu-satunya kawasan yang sesuai bermain sukan berkenaan.

Menurutnya, dia teruja selepas dia mendapat tahu pelbagai kemudahan sukan sedang dibina.

"Saya memang suka bersukan dan bila ada sukan lasak seperti wall climbing tu, buat saya tak sabar.

"Sebab selama ni kita tengok kat televisyen saja 'sukan-sukan lasak macam tu... jadi, bila ada peluang sebegini, saya nak sangat cuba," katanya.



FAHMI



UMAR

Rakannya, Ahmad Fahmi Khairi, 16, berkata, dia juga merupakan peminat sukan lasak dan sebelum ini terpaksa ke Shah Alam untuk mencuba sukan itu kerana di situ terdapat kemudahan yang lebih lengkap.

"Saya harap kemudahan itu memberi manfaat kepada remaja yang suka bersukan.

"Bagi saya daripada duduk melepak baik remaja memanfaatkan kemudahan yang disediakan, kesihatan pun dapat dijaga," katanya.